



ATASSUT

UPA15/91-1

Siverth K. Heilmann

17.03.2015.

Siunnersuut uunga: Tuniniaanissamik nittarsaassisarneq aamma nalunaaqutsersuisarneq pillugu Inatsisartut inatsisaat nr. xx, xx 2015-imeersoq.

(tuniniaanissamik nittarsaassisarnermut inatsit)

(Inuussutissarsiornermut, Suliffeqarnermut, Niuernermit Nunanullu Allanut Naalakkersuisoq)

Tuniniaanissamik nittarsaassisarnermut inatsisissatut siunnersuut pillugu siullermeerinninnermi ATASSUT-mit oqaaseqaatissavut ukuupput:

Atuisartunut pisisartunullu siunnersuisartoqatigiit, tuniniaasarneq, nalunaaqutsersuisarneq, akit aamma atuisartunut pisisartunullu maalaaruteqartarfittut ataatsimiititaliat pillugit Inatsisartut inatsisaat nr. 10, 13. november 1986-imeersoq atorunnaarsinniarnearpoq siunertarineqarluni inatsisissatut siunnersuut manna inatsimmut pineqartumut taarsiunneqassasoq.

ATASSUT-mit tunngaviusumik iluarisimaarparput atuisartut illersugaaner at malunnaatilimmik pitsanngoriartinneqassamat aammalu atuisartut illersugaaner at pillugu allaffissornikkut sullissinerup nutarterneqarnissaa pisussanngormat, naallu massa atuisartut siunnersuisooqatigiivisa aqqissuussaaner at ullumikkut ilisimasarput atorunnaarsinneqartussanngoraluartoq, Atuisartunut Pisisartunullu Siunnersuisartoqatigiit suliassai siunissami Atuisartoqarnermut Unammilleqatigiinnermullu Aqutsisoqarfimmit isumagineqartalissapput.

ATASSUT-mit isumalluarpugut sullissineq ullumikkut pitsaareeraluartoq siunissami suli pitsaanerulissasoq tunngavissalimmik ilimagisariaqarmat.

Atuisartut illersugaaner at annertuseriassaaq, pingaartumik meeqqat inuusuttuaqqallu ullumikkut inatsisitigut sinaakkusikkamik illersugaanngitsut inatsisissatut siunnersuutip matuma atuutsinneqalerneratigut annertuumik illersugaalissapput.



ATASSUT INATSIARTUNI

Tamatuma saniatigut aamma innuttaasut piseqqusaarutininik piumannigitsut naaggaarsinnaatitaanerit inatsisitigut isumannaarniarneqarpoq, tassunga tunngatillugu ATASSUT-mit isumaqarpugut niuernermik ingerlataqartut artukkerneqarnissaat minnerpaatinniarlugu suleqatigiittoqartariaqartoq.

ATASSUT-mit arajutsisimanngilarput sulisitsisut niuernermik ingerlataqartut matumani oqaluuserineqartoq misikkariffigisorujussuugaat aammalu qanoq inerineqarumaarnersoq alaatsinaaqqissaaraat, tamannalumi pissusissamisuginnarpoq, tassami inatsisissatut siunnersuutip malitsigisaanik pingaartumik taakku kalluarneqartussaagamik.

ATASSUT-mit assut kissaatigaarput neriutugalugulu atuisartut illuatungaanilu niuernermik ingerlataqartut tamarmik naammagisinnaasaannik siunnersuut manna inerineqarumaartoq, taamaattorli soorlu inatsisissatut siunnersuutip matuma ersersikkaa, niuernermik ingerlataqartut tuniniakkaminnik nittarsaassisarnerminnut nukinnik aningaasanillu amerlanerusunik atuilernissaannik nassataqartussaavoq, neriuppugullu inatsisissatut siunnersuutip suliarineqarnerani pitsaanngitsumik kingunerusussatut aarleqqutigineqartut pillugit sukumiisumik ataatsimiititaliami suliarinnittoqarumaartoq.

Tassami ATASSUT-mit maluginiarparput inatsisissatut siunnersuutip siullermeerneqarnissaanut piareersaalluni tusarniaanermi inuussutissarsiornermik ingerlataqartut sinniisaasa akissutaat imaannanngitsorujussuusut, naliliinerpullu naapertorlugu pisariaqarpoq aappasaaneerinninnginnermi inatsisitigut iliuuseriniakkat sukumiisumik qulaajarneqarumaartut.

Taamatut naatsunnguamik siullermeerinninnermi oqaaseqaateqarluta ATASSUT-mit inassutigissavarput siunnersuut aappasaaneerneqartinnani Inatsisartut Inuussutissarsiornermut Ataatsimiititaliaanit sukumiisumik misissuilluarlunilu suliarineqassasoq.